

العلاقات الإنسانية من خلفية هندسية

مهندس أيمن فوزى

إسم الكتاب : العلاقات الإنسانية من خلفية هندسية
إسم الكاتب : مهندس/ أيمن فوزي
تصميم الغلاف : م / أيمن فوزي
رقم إيداع : ٢٠٢١/٣٧٨١
ترقيم دولي: ١-٣٤-٦٨١٠-٩٧٧-٩٧٨



شارك سطورك مع العالم

العلاقات الإنسانية من خلفية هندسية
مهندس أيمن فوزى

The Writer Operation
شارك سطورك مع العالم

إهداء

أهدى هذا الكتاب إلى السند / فيفيان عبيد

أيوه أنت قريرتها صح ، ومفيش أى غلطة إملائية
ولا حاجة ، السند (مش السيد طبعاً 😊) السند اللي
دايماً موجودة فى كل تفاصيل حياتى ، السند اللي
بجد ، السند اللي طول عمرى بسند عليه بجد
وبحمله كل أحمالى ، السند اللي عمره ما إتخلى
عنى ولا سابنى ولا لحظة فى أى حاجة واجهتها.

السند اللي كنت أحب دايماً أتفرج على تعبيرات
وشها لما تقرأ حاجة كتبتها ، كنت بعرف هى فى
أنهى فقرة لما كنت بشوف تعبيرات وشها 😊

لما كانت ترفع حاجبها اليمين كنت بعرف إن فى
فكرة أول مرة تخبط فى نافوخها ، ولما كانت
ضحكتها تزلزل المكان ، كنت بعرف أنهى فقرة
بالظبط ضحكتها كده 😊 😊 😊

كانت ملامح وشها ببيان عليها أد إيه الأفكار
عجاها ، وأد إيه مبسوطه بيها.

وبرضه كان ببيان على ملامح وشها إن فى جزء
مش مفهوم أقصد به إيه ، وكنت ممكن فعلاً أعيد
صياغته من تانى عشان المعنى يوضح أكثر.

السند اللى كانت صديقتى من حوالى 22 سنة ☺
ومازالت برضه صديقتى لغاية دلوقتى.

السند اللى ربنا كرمنى إنها تكون شريكة حياتى ،
واللى غيرت منى كثير ، وخلتنى أصير أفضل.

السند اللى ممكن تستحمل عشانى أى حاجة ،
وممكن برضه تعمل عشانى أى حاجة.



إهداء إلى زوجتى السند / فيفيان عبيد

شكر خاص

أحب أشكر كل الناس اللى شجعتنى على الكتابة
لما عرفوا إنى عايز أكتب الكتاب ده ، الناس اللى
كانوا السبب فى إن الكتاب ده يخرج للنور .

أحب أشكر الناس اللى قرؤا بعض المواضيع فى
الكتاب ده وقت ما كنت بكتبها عشان آخذ رأيهم
وإنطباعاتهم ، وحقيقى فرق معايا جداً تشجيعهم
وحسسونى إنى بعمل حاجة كويسة .

الناس اللى إنبسطولى من الخطوة دى وشجعونى
عليها رغم إنى أحياناً كتيرة كنت بفكر أراجع
عنها لأنها خطوة جديدة وغريبة على .

أحب أشكر عيلتى اللى شجعونى كثير ، وأحب
أشكر كمان أصدقائى وزمائى اللى شغالين معايا
فى المكتب الفنى ، واللى يعتبرهم عيلتى الثانية ،
واللى هما يعتبروا أكثر ناس سمعت كلمات
الكتاب ده ، وحقيقى أنا بسبب ردود أفعالهم تجاه
اللى بيسمعه ، قررت آخذ خطوة الكتابة عشان
إحتمال ناس تانية تستفيد وتنبسط من الأفكار دى .



حقيقى شكر

نصيحة قبل ما تقرأ الكتاب ده

لو أنت من محبى القراءة زى حالاتى كده ،
الكتاب ده ممكن يخلص معاك فى قاعدة واحدة ،
وساعتها الإستفادة من الكتاب ده مش هتبقى زى
المطلوب ، لأن هدف الكتاب ده إنه يكون له تأثير
فى حياتك .

عشان كده يفضل إنك تقرأ موضوع واحد بس فى
اليوم ، وإنك تحاول تفكر فى الكلمات المكتوبة
وتشوف هى مكانها فين من حياتك ، ساعتها بس
هتستفيد من اللى بتقراه .

عشان كده حتى لو الكتاب شديك وحسيت إنك
عايز تكمل قراءة ، ماتعملش كده ، وإكتفى بإنك
تقرأ وتفكر فى اللى قرينته ، وإنك تحاول تطبق
اللى قرينته على حياتك .

بس برضه مش شرط إنك تمشى ورا الكلام ده ،
إمشى ورا إحساسك وحدسك ، ولو حسيت إنك
عايز تكمل قراءة ، إعمل كده ، وبعدين إبقى
إرجع إقرأ أكثر المواضيع اللى لمستك من تانى .

مقدمة

أنا إسمى أيمن فوزى صدقى ، إتخرجت من مدرسة صنایع خمس سنين (مدرسة جلال فهمى الفنية المتقدمة) سنة 2000 ، وبعدين كملت دراسة فى كلية الهندسة جامعة القاهرة لغاية لما إتخرجت من قسم القوى والآلات الكهربائية سنة 2005 ، ومن ساعتها أهلى ومراتى معتبرنى الكهربائى اللى المفروض يصلح أى حاجة تعطل فى البيت ، آه وربنا زى ما بقولك كده ☺

المهم ، أنا بقالى حوالى 15 سنة شغال مهندس ميكانيكا ، وبالتحديد مهندس إطفاء حريق (وماتسألنيش إزاي ، عشان دى قصة كبيرة محتاجة كتاب لوحده).

حقيقى أنا حبيت المجال ده جداً وتميزت فيه ، رغم إنى كنت بكره الميكانيكا وأنا فى الكلية والمدرسة الصنایع كمان (يعنى قعدت حوالى 10 سنين بكره ميكانيكا ، ومن يوم ما إشتغلت ، وأنا شغال مهندس ميكانيكا).

ما علينا من كل الهرى اللى فات ده ، بس قصة الكتاب ده بدأت من وقت لما كنت بدى محاضرات عن الحريق لفريق العمل الجديد فى

الشركة اللي أنا شغال فيها ، وعلى مدار سنين
كثيرة من المحاضرات دي ، بدأت أربط بين
الحاجات اللي بشرحها وبين حاجات بنقابلها في
الحياة وفي علاقتنا مع الناس وحتى في علاقتنا
مع نفسنا .

وبدأت في النص كده أوقف المحاضرة وأتكلم مع
الناس عن بعض الحاجات دي عشان أكسر جو الـ
Technical شوية ، والحقيقة إنى لاقيت قبول
وإستجابة منهم للأفكار دي ، وطبعاً ده شجعنى
أنى أكمل فى الموضوع ده لدرجة إنهم كانوا
بيستنوا المحاضرات دي عشان يسمعوا أفكار زى
كده .

وفى يوم من الأيام فى حد من اللي بيسمع الأفكار
دي دعانى لإجتماع شباب جامعى عشان أقول
الأفكار دي ، لكن حقيقى فى البداية رفضت ، بس
فى نفس الليلة دي بالليل وأنا بحاول أنام ، لقيت
فكرة بتيجى ورا فكرة ، لغاية لما كونت مجموعة
أفكار ، وتانى يوم الصبح بلغت الشخص ده بانى
موافق على دعوته .

أنا قدمت الأفكار دي فى 3 إجتماعات زى كده ،
والحقيقة إن كل مرة كان بيبقى عندى أفكار جديدة
بقولها .

عشان كده فكرت إنى أجمع كل الأفكار اللي
وصلتلها حتى وقتنا هذا ، فى كتاب وأنشره ،
يمكن حد يستفاد من أى فكرة منها.


الأفكار اللي هتقروها هنا هى أفكار متعددة
ومختلفة ، قد تكون غير مترابطة ببعضها ، وقد
يبدو لك أحياناً إنهم عكس بعض.

الأفكار دى مش مكتوبة فى أى كتاب قبل كده ،
ماتدورش عليها يعنى ، لأنها نتاج خبرة حياة ،
نتاج خبرتى أنا الشخصية فى الأربعين سنة اللي
عشتهم لغاية دلوقتى ، ولكن ده لا يعنى إنهم أفكار
جديدة ، ممكن تكون الأفكار دى إتقالت قبل كده
من ناس كتير قبلى ، بس الفرق إن أنا بقدمها لك
بطريقة تفكير مختلفة وبأمثلة مختلفة لأن الأمثلة
المذكورة هنا هى فى واقع الأمر ليها علاقة
بالخلفية الهندسية اللي أنا جاي منها.

الأفكار دى ممكن تساعدك فى تحسين علاقتك
بالأشخاص اللي حواليك ، أو حتى ممكن تساعدك
فى تحسين علاقتك بنفسك ، لأنها ممكن تفهمك
وتفسر لك رد فعل الناس تجاهك ، ده ممكن
يساعدك فى تحسين أمورك.

المطلوب منك إنك تفكر فى كل الأفكار دى ،
وحدد مين من الناس اللي تعرفهم فى حياتك
ينطبق عليه الأفكار دى.

الرسمة اللي تحت دي هتبين لك كويس طبيعة
 الدماغ اللي فكرت في الأفكار دي وهتبين كويس
 الخلفية الهندسية اللي أنا جاي منها ، الرسمة دي
 لمادة كنت بدرسها زمان في إعدادي هندسة
 (يعنى أول سنة في الكلية) ، المادة دي إسمها
 هندسة وصفية (دي مادة تتخيل فيها إنك بترسم
 في الفراغ) ، تخيل بقى دي مادة كانت بتتدرس
 في أول سنة في الكلية ، تخيل بقى على التخرج
 كده كنا درسنا إيه ☺ ☺ ☺



جاهز بقى إنك تسمع الأفكار دى 😊 ، لو جاهز
يبقى يالا بينا 😊

أيمن فوزى

كلمات

هسالكم عن كام كلمة كده ، وعايزك تفكر فى أول
مدلول أو معنى جه فى دماغك أول لما سمعت
الكلمة دى :

..... كيلو

..... ميجا ، جيغا

..... سنتى ، ميللى

..... فيمتو

لو عايز تكتب فوق مكان النقط أول حاجة جات
فى دماغك لما سمعت الكلمات دى ، إعمل كده.
أنا هقولك أغلبية الناس جاوبت بايه لما سمعت
الكلمات دى ، وأعتقد إن أنت كمان ممكن تكون
دى نفس إجاباتك :-

كيلو (جرام - قوطه - خيار - وزن- ريجيم)

ميجا ، جيغا (نت - فلاشه - باقه - آيس كريم
"عشان ميجا يعنى وكده 😊")

سنتى ، ميللى (طول)

فيمتو (ثانية - دكتور زويل - وقت)

لكن الحقيقة إن كل الإجابات دى غلط ، لأن
 الحقيقة إن كل الكلمات اللى فاتت دى هى عبارة
 عن أرقام ، أيوه أرقام ، أنت مستغرب طبعا ،
 بس هى دى الحقيقة .

يعنى زى ما فى كيلو قوطه ، فى برضه كيلوات
 ، و كيلو فولت ، لأن كيلو تعنى رقم 1,000 يعنى
 واحد وقدامه 3 أصفار ، و برضه ميغا تعنى
 1,000,000 يعنى واحد وقدامه 6 أصفار .
 هسبيلكم صورة فيها كل المسميات والأرقام دى .

The Prefixes Used with SI Units

Prefix	Symbol	Meaning	Scientific Notation
exa-	E	1,000,000,000,000,000,000	10^{18}
peta-	P	1,000,000,000,000,000	10^{15}
tera-	T	1,000,000,000,000	10^{12}
giga-	G	1,000,000,000	10^9
mega-	M	1,000,000	10^6
kilo-	k	1,000	10^3
hecto-	h	100	10^2
deka-	da	10	10^1
—	—	1	10^0
deci-	d	0.1	10^{-1}
centi-	c	0.01	10^{-2}
milli-	m	0.001	10^{-3}
micro-	μ	0.000 001	10^{-6}
nano-	n	0.000 000 001	10^{-9}
pico-	p	0.000 000 000 001	10^{-12}
femto-	f	0.000 000 000 000 001	10^{-15}
atto-	a	0.000 000 000 000 000 001	10^{-18}

بس الحقيقة إن أغلبية الناس جاوبت نفس الإجابات ، لأن عندهم حكم مسبق عن الكلمات دي ، وبمجرد إنهم سمعوا الكلمات دي ، بدأوا يجاوبوا نتيجة حكمهم المسبق.

الحكم المسبق يعنى الإجابات الجاهزة ، القوالب اللي إحنا حاطين فيها الحاجات ، واللى بتطلع بمجرد ما تيجى سيرة الحاجات دي.

الحقيقة إننا عندنا أحكام مسبقة على حاجات كتيرة فى حياتنا ، عندنا أحكام مسبقة عن أشخاص ، عن مجموعة من الناس ، عن ديانة معينة ، عن مذهب معين ، عن شعوب معينة ، عن بلدان معينة ، عن أفكار معينة ، عن الرجال ، عن النساء ، والأكثر صعوبة إننا عندنا حكم مسبق عن نفسنا ، أيوه عن نفسنا !!!! ، والحكم المسبق عن نفسنا بيمنعنا إننا نعمل حاجات كتيرة لأن دايماً بنقول لنفسنا أنا مش هقدر أعمل ده ، أو إن الشئ ده صعب علىّ جداً وإستحاله أنجزه.

الحكم المسبق على نفسى ، بيمنعنى من النمو ، بيوقف عقبة فى طريق إنى أتغير للأحسن ، حكمى المسبق على الأشخاص بيمنعنى إنى أكتشف أشخاص جميلة ممكن يبقوا موجودين فى حياتى.

أنت ممكن تكون خسرت أشخاص فى حياتك نتيجة حكمك المسبق عليهم ، ممكن تكون خسرت

وظيفة ، أو حتى سفريّة أو خروجة حلوة نتيجة
حكّمك المسبق.

حكّمى المسبق على الأشياء أو الأشخاص أو حتى
على نفسى ، هو أكبر عقبة ممكن أواجهها فى
حياتى.

توقف فوراً عن أحكامك المسبقة ، وإدى لنفسك
فرصة إنك تتعرف على الأشياء والأشخاص عن
قرب.

غسيل المواعين

حد بيعرف يغسل مواعين ؟ طيب لما بتيجى
تغسل المواعين وتلاقيها متسخه جدا وتلاقيها
مليانه دهون كتيرة ، يا ترى بتعمل إيه ؟

أنا بصفتى شخص يغسل مواعين كتير و عندى
خبرة فى الموضوع ده ، أقدر أفيدك فى القصة
دى ، وأقدر أقولك ممكن تعمل إيه عشان تعرف
تقضى على كل الدهون والحاجات المتسخه دى.

كل اللي عليك إنك تقعد تدعك الحاجات دى
كتيبيبير وتفضل تدعك وتدعك لغاية لما تزول ،
وساعتها بس هتلاقى المواعين دى بقت بتلمع
ورجعت أكنها جديدة من تانى.

بالظبط ده اللي بيحصلنا لما الدنيا تقعد تدعك فينا
، بتخلينا نتغير ، بتخلينا نتجدد ، وكأننا بنرجع
نلمع من الأول.

كلنا بنتضايق من الظروف الصعبة والألم والوجع
اللى ممكن نقابلهم فى الحياة ، لكن الحقيقة إن
الألم والوجع هما نعمة وفرصة من الله عشان
نرجع نتجدد من الأول ونبقى أفضل.

المطلوب منك إنك تتقبل أى ألم أو ظروف صعبة
ممكن تواجهها فى حياتك ، ساعتها بس هتحس
بالإمتنان والرضا ، وساعتها بس حياتك هتتغير
للأحسن.

أنا شخصياً مررت بفترة صعبة فى وقت من
الأوقات فى حياتى بوجه عام وكانت الضغوط
كبيرة جداً ، ساعتها فكرت إنى أتحدى نفسى فى
حاجة طول عمرى بفشل فيها ، وقولت لنفسى أنا
لازم أنجح فى التحدى ده ، وإنى أكيد ساعتها
هقدر أتغلب على المشاكل والصعاب اللى بتقابلنى
فى حياتى.

يمكن ساعتها كانت فكرة غريبة وتكاد تكون
مجنونة ويمكن تبان ملهائش علاقة مباشرة باللى
بمر بيه وقتها ، بس أنا ساعتها كنت مؤمن إنى لو
نجحت فى تحدى نفسى ، ده هيكون حافز ودافع
لى إنى أنجح فى حل المشاكل والصعاب اللى
بواجهها.

وفعالاً قررت إنى لازم أخس ، الموضوع ده أنا
فشلت فيه على مدار سنين ، جربت طرق مختلفة
وحاولت كتير لكن كل مرة كنت بفشل. أنا كان
وزنى وقت ما قررت أعمل كده حوالى 113.5
كيلوجرام.

بدأت فعلاً المشوار وفرحت جداً لما نزلت ربع كيلو فى أول إسبوع ، رغم إنه ساعتها كان يعتبر إنجاز بسيط لكنه كان حافظ قوى بالنسبالي عشان أقدر أكمل.

وفعلاً كملت ، وبدأ وزنى ينزل أكثر وأكثر ، إسبوع بعد إسبوع وشهر بعد شهر ، وحقيقى ده حفزنى جداً بشكل عام فى حياتى ، وخلقى عندى قوة فى مواجهة الظروف والصعاب ، وساعدنى إنى أقدر أحل المشاكل الللى بقابلها فى حياتى.

النهاردة أنا وزنى حوالى 80 كيلوجرام ، ومش بس كده ، الموضوع ده شجعنى إنى أكمل وأبدأ فى موضوع الـ Body Transformation بمعنى إنى أبدأ أغير شكل جسمى وبقى الموضوع مش مجرد بفقد وزن وبس.

هسيبلكم شوية صور لى ، قبل وبعد ، عشان تحفزكم وعشان تتأكدوا إن فعلاً أى صعاب أو ألم ممكن تقابله فى حياتك ، هما فرصة للتغيير وإنك ترجع تتجدد من تانى ، وترجع تلمع ، وتصير أفضل.





بتعرف تعد لغاية كام؟

وإحنا صغيرين أوى كان الكبار ببسألونا السؤال ده "بتعرف تعد لغاية كام؟" وأكد كلنا إنبسطنا وإحنا بنجاوب إننا بنعرف نعد من (1) لحد (10) ولما كبرنا شوية صغيرين كمان عرفنا نعد من (1) لحد (20) ، ولما كبرنا أكثر شوية ، إنبسطنا أوى لما عرفنا نعد من (1) لغاية (100) 😊 😊

لو خدمت بالكم ، دايماً بداية العد بتبدأ من الرقم (1) وسواء الصغيرين اللي إتعلموا العد ، أو الكبار اللي علموا العد ، كلهم بيبدأوا من رقم (1) ، لكن الحقيقة إن فى رقم قبل رقم (1) وهو رقم (صفر) لكن طبعاً حضرتك هتقولى " (صفر) إيه يا عم اللي أنت بتتكلم عنه ، ده رقم ملهوش أى لازمة" ممكن فعلاً بيان إن عندك حق ، وإن رقم (صفر) ده ملهوش لازمة ، بس الحقيقة إن المشكلة مش فى رقم (صفر) ، المشكلة الحقيقية هو المكان اللي بتحط فيه رقم (صفر) 😊 😊

تعالوا نأخذ مثالين على الموضوع ده :-

العلاقة اللى تحسسك إنك ملكش لازمة ، سيبها
واقطعها ، وإبدأ علاقات مع ناس تانية لأنك
ساعتها هتبقى فى العلاقة الغلط ، فى المكان
الغلط.

الشغل اللى يحسسك إنك عديم الفائدة ، سيبه وإبدأ
فى مكان تانى جديد ، مكان يقدرك ويعرف قيمتك
كويس.

مفيش حد فينا ملهوش لازمة ، كل واحد فينا عنده
حاجات بتميزه عن الآخرين ، المهم إننا نكتشفها
والأهم إننا نكتشف مكاننا الصح والمضبوط ،
مكاننا اللى يخلينا نضاعف قيمة المكان اللى إحنا
فيه عشرات المرات 😊 😊

أنا (صفر) ، على أقصى اليمين

ما تيجوا نلعب

بما إنى مشيت مشوار فى موضوع الجيم ، وال
Body Transformation ، تعالوا نلعب
التمرين ده مع بعض.

ده تمرين إسمه همر Hummer وهو عبارد عن
إنك تمسك الدمبلز بحيث يكونوا عمودى على
دراعتك ، زى ما هو موضح فى الصورة ، وتنزل
وتطلع أكنك ماسك شاكوش وبتدق على رأس
مسمار.



طبعاً أغلبتتنا معدوش دمبلز ، بس مش مشكلة ،
إمسك أى حاجة ليها أى وزن ، زى مثلاً إزازة
مياه معدنية ، أو أى حاجة زى كده.

التمرين ده ممكن تعمله بإيد واحدة ، أو بالإيديين
بالتبادل مع بعض.

خلينا بس الأول نتفق على شئ ، وهو إن لما
العضلة تبدأ تشد عليك ، ده معناه إن العضلة بدأت
تستفاد من التمرين ، وهو ده المقياس اللى دائماً
بيقيسوا عليه قيمة التمرين وقوته فى عالم الجيم.

أنا عايزك تعمل التمرين ده مرتين ، أول مرة
تطلع وتنزل بس بسرعة.

أما بقى تانى مرة ، إعمل التمرين ده بس لما
تيجى تنزل بإيدك ، إنزل بشويش ، بالراحة ،
واحدة واحدة ، على أد ما تقدر.

فى كل مرة وأنت بتعمل التمرين ده كمل فيه لغاية
لما تلاقى نفسك مش قادر تكمل ، وفى كل مرة
عد أنت عملت كام عدة فى التمرين.

اللى هتلاحظه إنك فى أول مرة لما كنت بتطلع
وتنزل بسرعة ، أنت عملت عدات كتيرة لغاية لما
بدأت تحس إن العضلة شدت عليك.


لكن فى تانى مرة لما كنت بتتنزل بشويش ، أنت عملت عادات أقل وبدأت تحس إن العضلة شدت عليك .

معنى كده إن الفائدة من التمرين التانى أقوى من التمرين الأول لأن إحنا عدينا عادات أقل والعضلة بدأت تشد عليك .

السبب ورا الموضوع ده هو إنك لما بتتنزل بالدمبلز بشويش ، فأنت ساعتها بتقاوم النزول ، وبالتالي بتقاوم الجاذبية الأرضية ، اللى بدورها بتجذبك إنك تنزل لتحت لكن أنت بتقاوم النزول ده ، وبالتالي هنا بتيجى الفائدة من إنك تؤدى التمرين بالطريقة دى .

ده بالضبط اللى بيحصلك فى حياتك لما تقاوم السقوط ، لما تقاوم إنك تغلط ، لما تقاوم أى شئ يجذبك لتحت ، تحت أخلاقك ، تحت مبادئك ، تحت معتقداتك ، مقاومتك دى بتقويك ، بتخليك أقوى وأفضل .

فى تمرين تانى وهو تمرين العقلة ، زى اللى فى الصورة دى.



التمرين ده معتمد على وزن الجسم ، بمعنى إنك بترفع نفسك ل فوق وبعدين تنزل تانى.

التمرين ده لو أنت مبتدأ بيكون صعب عليك جداً إنك تعمله ، لأنك فى البداية مش بيبقى عندك القوة الكافية إنك ترفع نفسك ل فوق.

عشان كده لما ببيجوا يعلموا التمرين ده للمبتدئين ، بيخلوهم يقفوا على كرسى ويمسكوا العقلة ، وبعدين يبدأوا ينزلوا بشويش بجسمهم لتحت ، وبعدين يعيدوا التمرين ده بنفس الطريقة لغاية لما

يبقى عندهم القوى الكافية إنهم يقدرُوا يرفعُوا
نفسهم بدون إستخدام الكرسي اللى كانوا بيطلعُوا
عليه.

نفس الموضوع بالظبط ، طبقه على حياتك ، لو
أنت النهارده مش عندك القدرة إنك تطلع لفوق فى
حياتك ، إنك تخطوا خطوات إيجابية ، إنك تطلع
لقدام ، يبقى على الأقل قاوم السقوط ، قاوم إنك
تفشل ، قاوم إنك تقع لتحت ، قاوم أى شئ يجذبك
لأسفل.

مقاومتك المستمرة دى هتديك قوة فى يوم من
الأيام وتخليك تطلع لفوق ، هتخليك أحسن وأفضل
وأقوى.

ريموت التلفزيون

أکید كثير مننا أول لما قرأ عنوان الموضوع ده
إفكر كل الخناقات اللي كانت بتحصل فى البيت
على ريموت التلفزيون ، وأکید إفكرت مين أكثر
شخص فى البيت متحكم فى ريموت التلفزيون
وبيجيب القنوات اللي على مزاجه 😊 😊

أکید كثير إفكرت إن أحياناً الخناقات دى ممكن
تنتهى بأن حد يروح دايس على مفتاح الـ Power
بتاع التلفزيون ويروح قفله عشان يريح دماغه
من الخناقة 😊 😊

كثير مننا بيستخدم الريموت فى حياته ، مش بس
ريموت التلفزيون لكن ريموت لكل جهاز منزلى
فى البيت تقريباً ، لكن مفيش حد فينا قبل كده ركز
فى الشعار اللي على مفتاح الـ Power بتاع
الريموت.

الشعار ده بيبقى زى الموجود فى الصورة دى.



الشعار ده هو فى حقيقة الأمر عبارة عن رقمين (1) و (0) ، طبعاً أنت ممكن تكون مستغرب من الموضوع ده ، بس لو ركزت هتلاقى إن رقم (1) هو الخط الرأسى ، ورقم (0) هو الدائرة الغير مكتملة واللى بتحتوى رقم (1).

فى علم الكهرباء ، رقم (1) يعنى (ON)بمعنى إننا موصلين كهرباء ، ورقم (0) يعنى (OFF) بمعنى إننا فاصلين الكهرباء.

وعشان تصدق كلامى أكثر ، روح شوف المكتوب على مفتاح الـ Power الخاص بأى مشترك كهرباء ، هتلاقيه زى الصورة دى.



لو ركزت فى صورة المشترك هتلاقى إن الرقمين (1) و (0) مكتوبين هنا بكل وضوح مش زى المفتاح التانى.

ده عشان إن المفتاح الأول بقدر أشغل وأفصل منه
الجهاز ، يعنى لو ضغطت عليه مرة يشتغل
الجهاز ولو ضغطت بعد كده على نفس المفتاح
يفصل الجهاز.

الشخص اللى عمل اللوجو بتاع مفتاح الـ Power
هو الحقيقة أبدع جدااااا فى إنه يعمل لوجو يعبر
عن الموضوع ده بشكل خرافى ، لكن الحقيقة
رغم كل ده محدش خالص خد باله من كل
التفاصيل دى ، وإن اللوجو ده هو فى الأساس
عبارة عن رقمين (1) و (0).

بس ده فى نفس الوقت لا يمنع إن الناس كلها
عارفة إنها تقدر تشغل وتفصل الجهاز من نفس
المفتاح.

الحقيقة إحنا كمان أوقات كثير ممكن نعمل مجهود
خرافى فى شغلنا ، أو حتى فى علاقتنا ببعض
الأشخاص ، لكن ممكن محدش يشوف أوى
المجهود ده ويقدره زى ما إحنا شايفينه ، وأوقات
كثيرة كمان بنحس ساعتها بالإحباط ، وإن محدش
مقدر اللى بنعمله.


الموضوع ده فكرنى بحاجة كنت قررتها زمان فى
كتاب إسمه (السعادة تتبع من الداخل) ، كان
الكاتب بيتكلم عن التوقعات ، وإن توقعاتى
لتصرفات الناس تجاهى بتبقى من أكثر الحاجات
المخيبة للأمال :

"ما من شك فى أن لتوقعاتى الأثر العميق فى
إحلال السعادة فى حياتى. وهذه أمثلة يصعب
تعلمها. فبقدر ما أنتظر أن تأتيني السعادة من
الخارج ، من الأشياء أو من الأشخاص أنفسهم ،
أحكم على أحلامى بالموت إذ أن السعادة تتبع من
الداخل.

نحن فى غالبيتنا رومنطقيون فاشلون. والمؤسف
أن موت الآمال الرومنطيقية أمر عسير. نحن
نستمر فى نسج أحلام لا تمت إلى الواقع بصلة ،
ونروح نخفى حقيقة الواقع وراء أقنعة من الألوان
الزاهية. نبني قصوراً فى السماء ونقنع أنفسنا بأن
السعادة أشبه بمعادلة سحرية ، فإذا ما عرفنا
المعادلة ملكنا السعادة. ولكن القنوط سرعان ما
يдахمنا كلما بحثنا عن السعادة فى عالم الأشياء أو
إنتظرناها حتى من أيدى البشر".

ما تيجوا نلعب تانى

المرّة دى هنلعب تمرين أسهل شوية ، المرّة دى
إمسك دمبلز فى إيديك زى اللى فى الصورة كده ،
إختار وزن يكون خفيف وطبعاً زى ما إتفقنا قبل



كده ممكن تستخدم إزارة مياه معدنية أو أى حاجة
تانية بس المهم يكون وزنها خفيف.

إختار أى وضع من الأوضاع اللى فى الصورة ،
أو إختار أى زاوية ميول بينهم ، مش هتفرق كثير

المهم فى الموضوع إنك تثبت على الوضع ده
أطول وقت ممكن ، إثبت على الوضع ده دون أى
حركة ، لغاية لما تحس إنك مش قادر تكمل ،
لغاية لما تحس إنك مش قادر تشيل الوزن ده
تانى.

طيب هو إيه اللى حصل وخلاك مش قادر تكمل ،
مع إن إحنا إختارنا نشيل وزن خفيف؟

اللى حصل هو إنك شيلت الوزن ده لفترة طويلة ،
لوقت كبير ، ومع مرور الوقت بدأ الوزن ده يبقى
تقيل عليك ، رغم إنه كان خفيف ، لكنه أصبح
تقيل ، ومع مرور الوقت أكثر وأكثر ، الحمل ده
زاد لدرجة إنك مقدرتش تستحمل تشيله بعد كده.

هو ده اللى بيحصلك فى حياتك لما تقعد تشيل هم
حاجة معينة لمدة طويلة ، وتفضل متضايق من
حاجة معينة لوقت طويل ، وتقعد كل يوم تفكر فى
الشئ اللى مضايقتك ده ، وتقعد تحزن أكثر وأكثر ،
وكل يوم عن التانى مضايقتك بتزيد ، وحرزك
يكبر أكثر وأكثر لدرجة إنه هيجى عليك يوم
وماتقدرش تستحمل الحمل ده والحزن ده أكثر من
كده ، وساعتها هتلاقى نفسك بتنهار.

الوقت إما يكون دواء ، وإما يكون داء لكل
أوجاعنا ، وإحنا اللى بنختار ، ولما نقعد كل يوم
نفكر فى كل اللى بيضايقنا ، مع مرور الوقت

هنالقي إن الشئ اللي بيضايقنا أصبح كبير وتقبل
ومش قادرين نتحملة ، رغم إنه كان بسيط
وخفيف ، لكن حملنا ليه طول المدة والوقت الكبير
ده هو اللي زود حملة علينا.

توقف عن التفكير الكثير فى الشئ اللي بيضايقك
ومتخليهوش يطول معاك لمدة كبيرة عشان
هيجى يوم ومش هتقدر تتحمل.

إختار إنك تخلصى مرور الوقت بيبقى دواء مش داء.

إختبار قراءة

وإحنا صغيرين فى المدرسة كان بيبقى عندنا
إختبار قراءة وكان الهدف منه معرفة مدى تمكنا
من القراءة.

طيب لو أنا جيت دلوقتى بعد كل السنين دى
وقولتلك أنا عايز أدليك حاجة تقراها وتورينى
قدرتك على القراءة ، بيتهيالى هتحس إن أنا
مجنون ، وهترد عليّ وهتقولى "طيب ما أنا يا عم
أهوه عمال أقرأ الكتاب اللى أنت كاتبه ، بيبقى أكيد
بعرف أقرأ".

أنت صح ، وعندك حق ، بس إيه رأيك تعال كده
نجرب إنك تحاول تقرأ المكتوب فى الصورة اللى
تحت دى.

إن كنت لديقدر تعليققرأ عتهذهاالكلماتبكلسهولتفإنكإنسانذوقوتملاحظتكبيرة

صعبة ، صح؟ أنت أكيد دلوقتى رجعت تستهجي
زى زمان لما كنت صغير ، وممكن تكون عرفت

تقراها بصعوبة شديدة وممكن تكون معرفتش
خالص.

طيب تعال كده نجرب تانى ، وحاول كده تقرأ
الجملة المكتوبة فى الصورة الجاية دى.

إن كتب لديك قدره على فراءه هذه الكلمات بكل سهولة فإنك إنسان ذو فوه ملاحظه كسره

سقفة كبيرة ليك بقى عشان عرفت تقراها بكل
سهولة بالرغم إن الجملة مكتوبة أحرف فقط من
غير نقط ☺ ☺ ☺

طيب دلوقتى بعد ما قرئت الجملة المكتوبة فى
الصورة الثانية ، إطلع إقرأ المكتوب فى الصورة
الأولى ، ساعتها هتكتشف إنها نفس الجملة ☺

طيب إيه اللى حصل؟ الجملة الأولى كانت
الكلمات كلها ملزوقة فى بعضها وماكنش فى أى

مسافة تفصل ما بين كل كلمة والثانية ، لكن
الجملة الثانية بالرغم إن ماكنش فى نقط فوق
الحروف لكن عرفت بسهولة تقراها لأن كان فى
مسافة بين كل كلمة والثانية .

ده بالظبط اللي بيحصل فى العلاقات ، أحيانا
كثيرا بيبقى يهمنى إننا "نحط النقط فوق الحروف"
وكثير جدا بنسمع الجملة دى "إحنا لازم نقعد
ونحط النقط فوق الحروف" بنسمع الجملة دى فى
حياتنا سواء فى الشغل أو حياتنا الخاصة .

لكن الحقيقة مش هو ده أهم حاجة ، بدليل إن
الجملة الأولى "النقط كانت فوق الحروف" لكن
أنت معرفتش تقرأ الكلمات .

الحقيقى إن الأهم فى علاقاتنا هو المسافة
المضطبوطة بينك وبين الطرف الآخر ، هو ده الأهم
لأن المسافات لما بتضيع بين العلاقات ، هنا بتبدأ
المشاكل ، والمسافة دى مختلفة على حسب نوع
العلاقة ، يعنى المسافة بينك وبين الناس اللي
معاك فى الشغل أكيد مختلفة عن المسافة اللي
بينك وبين عائلتك ، وبرضه مختلفة عن المسافة
الى بينك وبين شريك حياتك .

حتى نفسك ، لازم يكون بينك وبينها مسافة آمنة ،
طبعا أنت هتحس إنى فعلا مجنون لما بقولك إن
لازم يكون بينك وبين نفسك مسافة ، بس حقيقى

الموضوع ده مهم جداً ، مهم يكون بينك وبين
ميولك اللي ممكن توقعك ، مسافة.

بينك وبين رغباتك الجامحة ، مسافة.

بينك وبين أفكارك السلبية ، مسافة.

مسافة تخليك تعيد التفكير فى الأمور ، وتخليك
تبعد عن الأشياء اللي ممكن تأذيك حتى لو كنت
بترغب فيها.

فى حاجة أخيرة عايز أقولكم عليها فى الموضوع
ده ، وهى إن المسافة دى لازم تكون منطقية
بمعنى متبقاش زيادة عن اللزوم ، زى الجملة اللي
فى الصورة الجاية دى.

أن كنت لديك قدرة على
رأفة هؤلاء كل ما تبك
هول فإني إنسان ذوق
ملاحظتك بيرة

لو حاولت تقرأ المكتوب فى الصورة اللى فاتت
دى مش هتعرف ، لأن المسافات هنا بقت غير
منطقية ، مابقتش بتكون كلمات وبالتالي مبقتش
بتكون جملة مفيدة.

وهى دى المشكلة اللى ممكن تقع فيها لو بالغت
فى المسافات بينك وبين الآخرين ، وهى إنك
ممكن تصبح شخص إنطوائى ومنغلق على نفسك.

المسافات الأمانة مهمة جداً فى حياتنا ، لما أنت
بتسمح إن الناس تتخطاها ، بتبدأ تقع فى المشاكل
ولما أنت بتزود المسافات دى زيادة عن اللزوم
بتصبح شخص منغلق على ذاتك.

مهم تحدد كويس المسافات دى بحيث تكون أمانة
لعلاقاتك المختلفة.

إختبار حساب

طالما عملنا إختبار قراءة فى الكتاب هنا ، يبقى ماينفعش نفوت تكلمة الكتاب ده من غير ما نعمل إختبار حساب (رياضيات – Mathematics) ، أنا كتبتها بكل الطرق عشان محدش يعمل نفسه مش فاهم بتكلم عن إيه بالظبط ويحاول يهرب من الإختبار ده 😊

طيب هاتوا ورقة وقلم وحلوا المسألة البسيطة دى

$$X = 3Y \quad X + Y = 8 \quad \text{Find } X \text{ \& } Y$$

إحنا فى المسألة اللي فانت دى عايزين نوجد X, Y بناءً على المعادلتين اللي فوق دى.

عامه ، أنا هسيبلكم مساحة فاضية هنا عشان تحلها ، وعامه أنا هحلها فى الصفحة الجاية ، بس حاول أنت لوحدك الأول 😊

الحل

$$X + Y = 8$$

$$(3Y) + Y = 8$$

$$4Y = 8$$

$$Y = 8/4$$

$$Y = 2$$

$$X = 3 * 2$$

$$X = 6$$

في المثال اللي فات ده عرفنا نوجد X لما وجدنا Y
اللي برضه عرفنا نوجدها عن طريق X 😊 😊

ده بالضبط اللي بيحصلنا في الحياة مع بعض
الناس القليلة الموجودين في حياتنا ، وهو إننا
بنلاقى نفسنا بوجودهم في حياتنا ، وكأني وجدت
ذاتي ونفسي (X) لما إتقابلت مع الناس دي (Y).

الناس دي هما اللي بينتشلوننا من الضياع اللي
بنبقى عايشين فيه لفترة من حياتنا ، الناس دي
بيصالحونا على نفسنا وبيخلونا نقدر نقبلها بكل
عيوبها ومميزاتها ، لأن الناس دي في الأساس

قدروا يقبلونا بكل عيوبنا ومميزاتنا ، عشان كده
قدروا يساعدونا على قبول نفسنا زى ما هي .

الأشخاص دى ممكن يكونوا حلوا معادلة حياتنا ،
وكملوا الناقص اللي فينا .

الناس دى مش شرط بس نكون قابلناهم فى حياتنا
الشخصية ، لكن كمان ممكن نكون قابلناهم فى
حياتنا العملية ، فى الشغل ، وكانوا سبب لنضوج
شخصيتنا وتطورها .

حقيقى يمكن يكونوا مش كثير فى حياتنا اللي
ينطبق عليه الكلام ده ، لكن أكيد فى حياة كل
واحد فينا هذا النوع من البشر ولو حتى قليلين
ويتعدوا على الصواب .

الناس دى وجودهم فى حياتك نعمة من الله ،
المفروض تشكر الله عليهم .

والمفروض كمان لو أنت دلوقتى جه فى بالك حد
وأنت بتقرأ الكلام ده ، يبقى إبعثله رسالة شكر
دلوقتى ، وعبرله عن إمتنانك لوجوده فى حياتك .



ما تيجوا نلعب مرة كمان

عمر ك قست طولك قبل كده؟ يمكن كثير مننا مفكرش يعمل الموضوع ده ، ولا كان من ضمن إهتماماتنا ، بيتهياى لو الصدفة سمحت بحاجة زى كده ، هنقيس طولنا ، لكن لو الصدفة مسمحتش ، مش هيبقى عندنا أى دافع إننا نسعى مخصوص إننا نقيس طولنا .

أنا عملت اللعبة دى كذا مرة فى المحاضرات اللى بديها ، والغريب إنى لاقيت قبول وفرحة غريبة من كل الناس إنهم عايزين يقيسوا طولهم ، الكل كان من جواه عايز يعمل كده ، حتى لو أظهر عكس كده عشان كان مكسوف أو محرر .


أنا إستعنت بمتر ليزر بنستخدموا فى شغل المواقع زى اللى باين فى الصورة كده .



وطلبت من كل واحد من الحاضرين إنه يقيس
طوله ، تفتكروا قاسوا طولهم إزاي؟ وتفتكر لو
أنت جاتلك الفرصة دى ، هتقيس طولك إزاي؟
أنت طبعاً مستغرب سؤالى ، صح؟

بيتهيالى إنك هتقولى ، "عادى جدا ، همسك المتر
وهحطه عند أعلى نقطة فى راسى وهقيس لغاية
الأرض"

برافو عليك ، هو فعلا كل الناس عملت كده ، بس
الحقيقة إن الناس كلها إنصدمت وحسوا إن أنا
بخشهم لما مسكت المتر عشان أقيس طولى بعد ما
كلهم قاسوا طولهم ، ولاقونى رفعت إيديا لأعلى
نقطة تقدر توصلها إيديا ، وقست الطول ما بين
أعلى نقطة وصلتها إيديا وبين الأرض ، زى
الصورة دى.



الصورة دى فيها مقاسين ، مقاس (X) زى
الطريقة اللى قاس بيها كل الناس ، ومقاس (Y)
زى الطريقة اللى أنا قست بيها. ومن الواضح إن
(Y) أكبر بكثير من (X) ، وطبعاً أنا فى اليوم ده
طلعت أطول من أطول حد موجود 😊

أنا عايز أقولكم حاجتين من اللعبة دى :

أول حاجة ، إن كل واحد فينا جواه طاقات
وإمكانيات هو لسه مكتشفهاش لغاية دلوقتى ،
عندك قوة كبيرة كامنة جواك ، محتاج إنك
تكتشفها وتطلعها للنور ، قوة و طاقة أكبر من اللى
ظاهره ليك .

مين فين لما يبقى عايز يجيب حاجة من المطبعية
بتاعة المطبخ ، بيرفع إيده لغاية مستوى راسه
بس؟ ولا واحد ، مضبوط؟ كلنا بنرفع إيدينا
لمستوى أعلى من مستوى راسنا عشان نطول
الحاجة دى ، ومين فينا لما ببيجي يشتري سلم
ألوميتال ، بيشتريه على أساس الطول لغاية
مستوى راسه؟ ، كلنا بنشتريه على أساس لما نقف
عليه ونرفع إيدينا لفوق نطول الحاجة بكل سهولة .

عشان كده أنا بقولك إن أنت جواك طاقات وقوة
وإمكانيات أكبر من اللى أنت تعرفها ، وأكبر من
اللى تعرفه عن نفسك ، واللى يخليك تكتشف القوة

والطاقات دى ، إما حد يكون شايف فيك الحاجات
دى زى مثلا صديق قريب منك ، أبوك أو أمك ،
أو مدير يكون أمين تجاهك ويشجعك على
إكتشاف نفسك.

أو بقى إنك تتعرض لظروف صعبة وعسيرة ،
تخرج من جواك كل الطاقة الكامنة فيك.

تانى حاجة عايز أقولها لك من اللعبة دى ، إن أنا
لما قست نفسى رفعت إيديا لأعلى نقطة تقدر
توصلها إيديا ، لكن فى نفس الوقت أنا كنت واقف
عدل على رجلى زى الصورة كده ، وموقفتش
على أطراف رجلى عشان أزود الطول.

وهقولك أنا ليه معملتش كده ، عشان ساعتها هبقى
واقف وأنا مش متزن ، وممكن بسهولة جدا أقع
على الأرض ، وبالذات لو واقف على سلم ، لأن
أنا هبقى جايب أخرى.

وهو ده الغرض التانى من اللعبة دى ، هو إنك
أوعى تجيب آخرك فى شئ معين ، متخليش
حاجة معينة تتعبك وتجبب آخرك فيها ، لأنك
ساعتها هتبقى مش متزن ، وساعتها ممكن
بسهولة جدا تقع وحياتك ممكن تتدمر.

بتعرف تقرأ؟

ماتلقفوش ، إحنا مش هنعمل إختبار قراءة تانى
ولا حاجة 😊😊

بس زى ما قولتلكم فى أول الكتاب إن أنا واحد
من محبى القراءة ، وإتعودت من سن مبكر
(تقريباً من سن أولى إعدادى) إنى أقرأ يومياً قبل
ما أنام بالليل.

أنا معرفش إيه سر إرتباطى الشديد بموضوع
القراءة ده ، هل يمكن لأنى إتعلمت أقرأ من سن
مبكر ، أنا إتعلمت أستهجى الكلمات من سن أولى
إبتدائى ، وبقيت بعرف أقرأ الجرائد من سن 2
إبتدائى تقريباً ، وكنت بنبسط أوى لما حد كبير
يقولى "خد إقرالى المكتوب فى الجرنال" 😊

حتى لو أنا مش عارف سر إرتباطى بالقراءة ،
لكن الشئ اللى متأكد منه ، هو إنى إتعلمت كتير
من كل شئ قريرته ، سواء كتب قصصية ، أو
كتب علم نفس ، أو كتب فلسفة ، كتب دينية ،
كتب إدارة ، أو حتى الكتب اللى قريرتها فى
الهندسة بشكل عام سواء أثناء الدراسة ، أو الكتب
اللى تخص الشغل والمجال اللى شغال فيه.

والحقيقة إنى مش بس إتعلمت كتير من الكتب دى ،
لكن كمان الكتب دى أثرت فى شخصيتى ،
وخلت عندى نوع آخر من النضوج ، ونوع آخر
من الفكر ، وفتحت مداركى.

"إقرأ" ، هو أول أمر مذكور فى القرآن الكريم ،
إتذكر حتى قبل أى شئ تانى ، وأعتقد إن ده دليل
على أهمية القراءة للإنسان ، وإنها أد ايه بتنمى
شخصيته وبتطورها وبتنمى معرفته ومداركه.

مفهوم القراءة بالنسبالي بقى أعمق بكتير من
مجرد القراءة اللى إحنا نعرفها ، اللى هى قراءة
الكتب.

الموضوع بالنسبالي دلوقتى هو أسلوب حياة ،
بمعنى إنى إستفدت من القراءة لدرجة إنى بدأت
أتعلم كمان إنى أقرأ المواقف ، أقرأ الأحداث اللى
بتحصل قدامى ، إنى أقرأ الأشخاص.

يمكن يكون الكلام ده غريب وجديد على أذهانكم
، لكن حقيقى القراءة بتعمل كده ، بتنمى وتطور
شخصيتك ، وبتخليك قادر إنك تعرف تقرأ الناس
اللى حواليك وتقرأ كمان اللى بيحصل حواليك.

فى جملة مشهورة بتقول إنك "تقرأ ما بين
السطور" ، بمعنى إنك تقرأ ما هو خفى ومش
ظاهر للناس العاديين.

الحقيقى إن القراءة تقدر تخليك تعمل كده ، تخليك
تقدر تتعرف بسهولة على اللى "ما بين السطور"
اللى غيرك يمكن يكون مش واخذ باله منه.

فى عيد ميلادى الأربعين ، جاتلى هدية من أحد
الأشخاص اللى شغالين معايا ، الهدية دى عبارة
عن قلم محفور عليه خصيصاً الجملة دى :

"BEST LEADER"

الحقيقى إن يمكن الناس اللى شغالين معايا شايفنى
كده ، بس الحقيقى برضه إن واحدة من الحاجات
اللى خلتنى كده هى القراءة الكثيرة.

أنادايماً بقول لنفسى الجملة دى :

**"To be BEST LEADER, you shall be
BEST READER"**

بمعنى إن عشان تكون قائد كويس ، لازم تكون
قارئ كويس ☺ ☺



ما تيجوا نلعب لعبة أخيرة

اللعبة دى محتاجة فريقين أو على الأقل شخصين ،
وبعدين نقطع ورقتين ونكتب فى كل ورقة الرقم
(6) بالإنجليزى زى الصورتين دول كده.



6



6

بس لما نيجى نوزع الورق على الفريقين ، نشقلب
ورقة من الورقتين ونديها لفريق منهم ، زى
الصورة دى كده.



9

وبعدين نسأل كل فريق منهم ، الرقم اللي معاك
كام؟

فى فريق هيجابوب إن الرقم اللي معاه هو رقم (6)
لكن الفريق اللي شقلبنا ورقته هيجابوب إن الرقم
اللى معاه هو رقم (9).

تفتكروا مين فيهم إجابته صح ، ومين فيهم غلط؟
ماتتسر عش فى الإجابة ، لأن لو السؤال اللي فات
مبنى على اللي شايفه كل فريق ، يبقى الفريقين
إجابتهم صح.

لكن لو السؤال اللي فات مبنى على اللي كتبناه فى
الأساس قبل ما نشقلب أى ورقة ، يبقى الفريق
اللى جاوب وقال إن الرقم هو (6) ، يبقى هو
الفريق اللي إجابته صح.

طبعاً أنا عارف إن كثير منكم هيقولى إحنا
عارفين اللعبة دى قبل كده ، إيه الجديد يعنى فى
الموضوع؟

طيب ما تتسر عش عشان اللعبة لسه هتبدأ 😊 😊
دلوقتى بقى هنخلى كل فريق يمسك الورقة بتاعته
زى ما إستلمها ويقف جنب الفريق التانى.

يعنى بمعنى آخر إننا نحط الورقتين جنب بعض
ونلزمهم فى بعض بحيث يبقوا أكنهم ورقة واحدة
زى الصورة دى بالظبط.

6

9

دلوقتى بقى نخلى كل فريق يقرأ الرقم المكتوب ،
هنا بقى الكل هيجتمع إن الرقم هو (69).

طيب لو شغلينا الورقتين بس وهما ملزوقين فى
بعض كده ، تفتكروا هيبقى الرقم كام؟

حاول تجاوب الأول قبل ما تعرف الإجابة من
الصورة الجاية.

أعتقد إن فى ناس كتير منكم جاوبوا وقالوا إن
الرقم هيبقى (96) ، طيب ما تيجوا نشوف 😊

6

9

الحقيقة إننا لما شغلنا الورقتين لما كانوا ملزوقين
فى بعض ، الرقم فضل زى ما هو (69)
وماتغيرش ولا حاجة 😊

ده لأن رقم (9) لما راح هناك بقى (6) ، والعكس
صحيح ، رقم (6) لما غير مكانه بقى (9) 😊 😊

أنا عايز أقولكم على حاجتين فى الموضوع ده :
أول حاجة هو إن مفيش حد فينا يمتلك الحقيقة
كاملة ، كل واحد فينا يمتلك جزء من الحقيقة ،
عشان كده دايماً المشكلة اللي بنقابلها هو إن كل
واحد فينا شايف للأسف إن هو الوحيد اللي صح
وباقى الناس غلط.

تانى حاجة بقى وهى الأهم ، إن لو كل واحد فينا
حط نفسه مكان الطرف التانى وشاف الموضوع
من منظور ووجهة نظر الطرف الآخر ساعتها
بس هيشوف الموضوع كله من كل زواياه
وساعتها هيقدر يشوف الحقيقة كاملة ، وساعتها
هتبقى الحقيقة واضحة ومهما شغلنا الأمور
هتفضل الحقيقة زى ما هى لأننا هنكون خدنا كل
الآراء والأفكار المختلفة فى إعتبارنا.

أنت لا تملك الحقيقة كاملة ، أنت تملك جزء منها
والرأى الآخر المختلف عنك يملك بقيتها.

Recycle Bin

فى أوائل التسعينات لما إستعملت الكمبيوتر لأول مرة فى حياتى ، إنبهرت به جداً وإنبهرت بالتكنولوجيا اللى كانت موجودة وقتها ، لكن يعتبر من أكثر الحاجات اللى عجبتنى ساعتها هى Recycle Bin ، يمكن أنت ممكن تستغربنى دلوقتى ، لكن وقتها كان الموضوع مبهر حقيقى لأن فكرة إنك ممكن ترجع حاجة مسحتها ، كانت فكرة مبهرة فى الزمن ده ☺ ☺

طيب أنا عايز نلعب لعبة بسيطة سوا ، وهى إنك تفتح الـ Recycle Bin الموجودة على جهاز الكمبيوتر بتاعك وإمسح كل اللى جواها ، بس طبعا بعد ما تتأكد الأول إنك مش عايز أى ملف موجود جواها.

بعد ما تعمل كده ، إقفل الـ Recycle Bin ، ساعتها هتلاقى شكلها بقى عامل زى الصورة دى.



طيب دلوقتى بقى أنا عايزك تفتح ملف Word جديد ، وماتكتبش فيه حاجة خالص وبعدين إقفله ، وبعد كده إمسحه ، ساعتها هتلاقى صورة الـ Recycle Bin بقت بالشكل ده.



لو دقتت كويس فى الصورة هتلاحظ إن الـ Recycle Bin بقت مليانة على الآخر ، مع إنك مسحت ملف واحد بس ، وتانى حاجة كمان الملف ده كان أصلاً فاضى !!!

الحقيقة – وللأسف – إننا بنقابل ناس فى حياتنا قلوبهم عاملة زى الـ Recycle Bin ، فجأة تلاقى قلوبهم بقت مليانة من ناحيتك دون أى أسباب معروفة.

الحقيقى إن الناس دى بيقوا مصدر طاقة سلبية موجودة فى حياتك.

الموضوع ده فكرنى بقصة يمكن مش كثير منا يعرفها ، وهى قصة الزارع اللى خرج عشان يزرع أرضه ، لكن وهو فى الطريق سقطت بعض الحبوب على بعض الأماكن ، من ضمنها أماكن كانت حجرية ، يعنى مفيهاش تربة ، لكن الحبوب اللى وقعت فى الأماكن الحجرية دى طلعت زرع بسرعة ، لكن لما الشمس طلعت ، الزرع ده إتحرق ومات لأنه ماكنش له أصل أو بمعنى أدق عمق ، أو تربة خصبة.

عشان كده إحنا كمان ممكن يكون فى حياتنا أشخاص تربطنا بيهم علاقة عميقة من طرفنا إحنا بس ، لكن هما ممكن يكونوا لأ.

أنا فى الموضوع ده بالذات مش هقدر أنصحك بنصيحة معينة ، لأن الموضوع ده بيختلف من شخص لشخص ، لكن أنا هنا زى ما قولتلك فى مقدمة الكتاب إنى ممكن الأمثلة اللى موجودة فى الكتاب ده تفسر لك بعض الحاجات اللى بتقابلها فى حياتك مع بعض الناس وأنت ممكن تبقى مش فاهم بالظبط إيه اللى بيحصل.

بس لو أنت عايز تعرف خبرتى الشخصية فى الموضوع ده ، أنا هقولك ، أنا عن نفسى مراراً وتكراراً حاولت كذا مرة أنضف اللي موجود جوه الـ Recycle Bin وكذا مرة أقعد مع الأشخاص اللي من النوع ده وأتعاتب معاهم عن طريقة تصرفاتهم الغربية والموضوع ينتهى بسلام لأنى كنت كل مرة بأجى على نفسى فى سبيل الإحتفاظ بالأشخاص دى فى حياتى ، لكن مع الوقت حسيت إنى تحملت كتير وإنى جيت أخرى (زى ما وضحتك قبل كده فى لعبة المتر الليزر) ، عشان كده قررت إنى مش هكمل بنفس الطريقة فى العلاقة مع الأشخاص دى.

اللى عليك دلوقتى هو إنك تفكر وتحدد مين من الناس اللي تعرفهم فى حياتك ، قلبه عامل زى الـ Recycle Bin ، ساعتها بس أنت وحدك اللي تقدر تقرر صورة اللي جاى بينكم.

ما بين المطرقة والسندان

زمان أوووى سنة 1995 لما كنت بدرس فى مدرسة الصنایع ، كان عندى يوم كامل كل إسبوع بندخل فيه ورشة من الورش وبنقضى طول اليوم بنتعلم حاجات كتيرة وبنشتغل فى الورشة ، وطبعاً طبيعة اللى بنشتغله بيبقى له علاقة بالورشة اللى بندخلها.

وكان كل فترة ندخل ورشة مختلفة نتعلم فيها حاجات مختلفة ، مرة ورشة خراطة ، مرة ورشة كهرباء ، مرة ورشة سيارات ، وهكذا.

مرة بقى دخلنا ورشة الحدادة ، وعرفونا ساعتها على حاجة إسمها (سندان) وبعدين زعوا على كل واحد فينا (مطرقة) ، زى اللى فى الصورة كده.



وبعدين إدوا لكل واحد فينا سيخ طوله متر ، وكان
على شكل مربع ،
زى اللى باين فى
الصورة.



وطلبوا مننا إننا نحول
الشكل الرباعى ده
إلى شكل ثمانى عن
طريق وضعها على
السندان ثم الطرق
عليها.

وفعلًا كل واحد فينا بدأ يضرب بالمطرقة على
أحرف السيخ ده عشان نحوله لشكل ثمانى (الحمد
لله إنى مش من الجيل الحالى ، وإلا كان ممكن
يدونا قطعة شغل ويقولولنا حولوا القطعة دى من
بوز الإخس إلى بوز البطة 😊 😊 😊).

وفعلًا بعد مجهود كبير ، بدأت قطعة الشغل دى
تتشكل وتتحول من الشكل المربع للشكل الثمانى ،
وحقيقى الواحد ساعتها إنبسط إنه عرف يعيد
تشكيل القطعة دى 😊

ده بالظبط اللى بيحصل لكل مدير موجود فى
مسئولية معينة ، بيبقى عامل كده زى قطعة
الشغل ، محطوط (ما بين المطرقة والسندان).

دائماً عنده تعليمات من الإدارة العليا (المطرقة) ،
ودائماً عنده طلبات ورغبات من الموظفين
المسئول عن إدارتهم (السندان).

دائماً يحاول ينفذ تعليمات الشركة بحيث يطلع
أكبر قدر من الشغل من الموظفين اللى مسئول
عنهم ، لكن فى نفس الوقت مطلوب منه إنه
يراعى طلباتهم وإحتياجاتهم.

والموضوع ده أحياناً كثيرة بيبكون مش سهل ،
لأنك لازم تراعى حق المنشأة اللى أنت شغال فيها
بس فى نفس الوقت لازم تراعى حقوق الناس
اللى مسئول عن شغلهم.

الموضوع ده مرهق ومتعب لأقصى درجة ،
وكتير من الأحيان بيبجى على حساب أعصاب
وقدرة تحمل الشخص ده ، بالذات لو الشخص ده
عنده أمانة تجاه الطرفين.

لكن الحقيقة إن الشئ الإيجابى فى الموضوع ، إن
شخصيته بتتشكل من جديد ، بيصبح شخص
مختلف ، شخص قادر على التفكير خارج
الصندوق عشان يحاول يلاقى حلول يراعى فيها
حق الشركة ، وفى نفس الوقت يرضى الناس اللى
شغالين معاه.

لو أنت مدير فى مكان ما ، إعرف إنك هتتخط
"ما بين المطرقة والسندان" ، إعرف إنك هتتعب
وهتتألم كتير ، بالذات لو أنت شخص أمين.

إعرف إنك هتعانى من الطرفين ، وإعرف إن
بالك هيفضل دايمًا مشغول ، وإنك هتفضل تعمل
فى تباديل وتوافق عشان توصل لأنسب طريقة
تطلع بيها شغل من الناس اللى شغالين معاك وفى
نفس الوقت يكونوا مرضيين.

لكن رغم كل ده ، إعرف كمان إن شخصيتك
هتتشكل من أول وجديد ، وبعد مرور السنين
هتكتشف إنك بقيت شخص مختلف ، شخص تانى
خالص ، شخص عنده كمية نضوج أكبر ،
شخص قادر على حل المشكلات وإدارة الأزمات
شخص غير اللى كنت تعرفه زمان 😊 😊



بتعرف تكوى؟

يا ترى كام واحد فيكم بيعرف يكوى الهدوم
كويس؟

طيب لما بتيجى تكوى الهدوم بتعمل إيه بالظبط؟
أنا عايزك تفكر مع نفسك كل الخطوات
بالتفصيل.

طيب إيه رأيك لو إديتك هدوم زى اللى فى
الصور دى عشان تكويها ، تفكر هتبقى سهلة ولا
صعبة وأنت بتكويها؟



طبعاً أنت هتقولى إنهم سهلين جداً ، وفعلاً هما
سهلين وتقدر تكويهم بكل سهولة ، وبمجرد ما
تفردهم على ترابيزة المكواه هتبدأ تمشى عليهم
بالمكواه وبسرعة وبسهولة هتكويهم.

طيب لو إديتك بقى هدوم زى اللى فى الصور دى
هتعمل إيه؟



فى منكم اللى هيشوفهم سهلين ، لكن فى منكم اللى
هيقدر إنه يوديهم للمكوى 😊 😊

الحقيقة إنك لو حببت تكوى البلوزات اللى فاتت ،
فأنت لازم تأخذ بالك كويس من كل الخطوط
الموجودة فيهم وتحاول تفرد البلوزة مرة فى

الإتجاه دى ، ومرة ثانية فى إتجاه تانى ، وهكذا
عشان تقدر تكويها كويس وتطلع مظبوطة ، لإنهم
مختلفين تماماً عن المجموعة الأولى.

ولو أنت حاولت تكويهم بنفس الطريقة اللي كويت
بيها المجموعة الأولى هتلاقيهم إتكسروا
والخطوط اللي فيهم ضاعت وبقي شكلهم وحش.

بمعنى إنك لو ماكونتش أدركت الإختلاف بين
المجموعتين ، وكنت إتعاملت مع المجموعة
التانية زى المجموعة الأولى ، كنت أكيد بوظت
المجموعة التانية.

ده بالضبط اللي بيحصل فى الحياة لما مانعرفش
ندرك ونقبل إختلافات بعض ، ويمكن يكون أغلب
المشاكل اللي بنواجهها فى حياتنا سببها عدم قبول
الآخر المختلف عنى فى الفكر ، أو فى الآراء أو
وجهات النظر.

عدم قبول الآخر المختلف عنى فى الشكل أو
اللون أو الدين أو الوظيفة أو الطبع أو
كل واحد فينا بيبقى عايز الناس تقبله زى ما هو ،
تقبله بمميزاته وعيوبه ، تقبله حتى لو مختلف
عنهم فى بعض الأشياء والأمور.

لكن اللي أنت مش واخد بالك منه ، إن الآخر
المختلف عنك فى بعض الأمور ، هو كمان بيبقى
عايزك تقبله زى ما هو ، بإختلافاته.

ونفضل كلنا نلف فى دائرة مفرغة ، ونفضل كلنا
نور على حد يقبلنا زى ما إحنا بإختلافاتنا ،
ومحدثش فينا بياخد الخطوة ويبادر تجاه إنه هو
اللى يبدأ بقبول الآخر المختلف عنه.

على الفيسبوك فى حاجة مشهورة وكلنا ظهرت لنا
إسمها "People You May Know" هى عبارة
عن تخمينات لناس ممكن تكون تعرفهم ، بس
السؤال هنا هو إزاي الفيسبوك بيخمن الناس دى؟

الحقيقى إنك لو ركزت شوية هتلاقى إن أغلبية
الناس دى بيبقى فى عامل مشترك وهو إما صديق
مشترك ، أو إنه درس معاك فى نفس الجامعة ،
أو أنت ممكن تكون قابلت الشخص ده وسجلت
رقمه على موبايلك ، أو إفتراضات تانية كتيرة.

الحقيقة بقى إننا فى العالم الافتراضى "فيسبوك"
كلنا بنقبل بعض على الفيسبوك وبنبعت لبعض
"Friend Request" مع إن العامل المشترك
ممكن يكون حاجة واحدة.

لكن إحنا للأسف فى العالم الحقيقى ما بنعرفش
نقبل بعض ولا إختلافات بعض ، رغم إن ممكن
تبقى فى حاجات كتيرة مشتركة وحاجة واحدة بس
أو حاجات قليلة وبسيطة اللى فيها إختلاف.

عداد الضغط

أنا شغال فى مجال إطفاء الحريق زى ما ذكرت فى المقدمة قبل كده ، وإحنا فى المجال ده بنركب شبكة مواسير ، والمواسير دى بتبقى طول الوقت مليانة مياه ومضغوطة بحيث بتبقى جاهزة عشان – لا قدر الله – لو حصل حريقة نقدر نطفئها على طول.

وطبعاً عشان نقدر نخلى المواسير دى مليانة مياه طول الوقت ومضغوطة ، لازم بعد ما نخلص تركيب المواسير نعمل إختبار ضغط عشان نتأكد إن مفيش أى تسريب من شبكة المواسير وبالتالي نقدر بعد كده نملى شبكة المواسير دى بالمياه ونسيبها مضغوطة طول الوقت.

فى إختبار الضغط ده بنستخدم عداد ضغط ، عشان يساعدنا نقرأ الضغط اللي جوه المواسير ، زى اللي موجود فى الصورة دى.



المهم بقى فى الموضوع ده إن أنت عشان تعرف
تأخذ القراءة المظبوطة للعداد ، لازم تقف قدامه
بالظبط عشان تبقى القراءة صحيحة.

لكن لو وقفت بزاوية شوية يمين العداد ، ساعتها
هتقرأ قيمة أكبر من القيمة الحقيقية ، ولو وقفت
بزاوية شوية شمال العداد ، ساعتها هتقرأ قيمة
أقل من القيمة الحقيقية.

ده بالظبط اللي بيحصل معنا فى الحياة ، ممكن
نقابل ناس تشوفنا بقيمة أقل من قيمتنا الحقيقية ،
وممكن برضه نقابل ناس تشوفنا بقيمة أكبر من
قيمتنا الحقيقية.

الحقيقى إن قيمتك الحقيقية هي جواك ، وأنت
الوحيد اللي تقدر تحدها مش الناس.

عشان كده بلاش تتأثر بأراء الناس فيك ، وبلاش
تهتم الناس شايفاك إزاي ، وإيه هي صورتك فى
عيونهم.

بلاش تطير فى السما من مدح الناس الإيجابى
فيك ، وكمان بلاش تقع لسابع أرض من ذمهم
فيك.

هما إثنين بس مفيش غيرهم اللي يهملك صورتك
قدامهم ، أنت والله ، فقط لا غير .

لو حسيت فى يوم من الأيام إن صورتك إتهزت
قدام نفسك ، أو إتهزت قدام ربنا ، يبقى ساعتها
بس إعرف إن فى مشكلة حقيقية ، وساعتها بس
يبقى لازم تشتغل على نفسك عشان تقوم من تانى
وترجع صورتك اللي ترضيك قدام نفسك .

أنت الوحيد اللي ليك الحق فى الحكم على نفسك
وإنك تقيمها وتقومها لو محتاجة تقويم .

موتور المياه

فى أغلبية بيوتنا القديمة ، كان بيبقى عندنا موتور مياه متركب فى الدور الأرضى عشان يقدر يوصل المياه للأدوار العليا.

وكثير مننا سمع جملة "الموتور ده كذا حصان" ، ده معناه قدرة الموتور ، وأكد كل ما عدد الأحصنة زاد ، كل ما كان الموتور ده أقوى ، وبالتالي يقدر يوصل المياه لمسافة أكبر وأعلى.

لكن الحقيقى إن فى حاجة مش كثير من الناس يعرفوها ، وهو يعتبر المسئول الأول عن توصيل المياه لمسافة أكبر وأعلى ، وهو "الضغط".

والتعريف الهندسى بكل بساطة للضغط هو "القوة على المساحة" ، زى المكتوب فى الصورة دى

$$P = \frac{F}{A}$$

P = pressure

F = force

A = area

معنى كده إن كل ما زاد الضغط ، كل ما زادت
وكبرت المسافة اللي يقدر يطلع بيها لفوق.

ده بالظبط شبه اللي بيحصلنا فى الحياة ، كل ما
كان الضغوط اللي نتعرض لها أكبر ، كل ما قوة
تحملنا بتبقى أكبر ، وكل ما نقدر نوصل لمكانة
أعلى.

كثير منا بيرفض الضغط اللي بيتعرض له ،
ومش بسهولة بنقدر نقبله ، وده طبيعى مفيهوش
مشكلة ، لكن المهم إننا لازم نتعلم إزاي نتعامل
مع الضغوط لأنها حقيقى بتساعدنا نوصل لمكان
ومكانة أكبر.

الموضوع ده شبه كده إستخراج البترول والمعادن
الثمينة من باطن الأرض ، الطاقات دى عشان
نقدر نخرجها من باطن الأرض ، لازم نحفر
لأعماق كبيرة داخل باطن الأرض.

إننا كمان جوانا طاقات كبيرة وثمانية ، وعشان
تطلع للنور لازم يتحفر جوانا ، لازم نتعرض
للضغوط ، عشان هى دى اللي هتساعد إن كل
الطاقات دى تظهر.

وساعتها هنتفاجئ من نفسنا ، وهنتفاجئ من كل
القوة والطاقة اللي كانت مدفونة جوانا دى ☺

الموضوع ده كمان شبه الزرع ، أنت عشان
تزرع أى حاجة ، بتجيب البذرة الأول وتدفعها فى
التراب ، بتحطها فى عمق فى الطين ، لكن بعد
كده ، البذرة دى بتطلع من الطين وبتكبر وبتبقى
شجرة كبيرة ☺

إفتكر دائماً الجملة دى :

"لن تنمو وتثمر ، إن لم تنغرس فى الطين أولاً"




يا فاشل يا فاشل يا فاشل

لما دخلنا المدرسة بدأنا نسمع جملة "ذاكر كويس
عشان تنجح وتجبب مجموع" ، وبرضه سمعنا
جملة "لو مذاكرتش هتبقى فاشل زى فلان" ،
ومن ساعتها وإحنا بقينا بنجرى ورا النجاح وبقينا
بنهرب من الفشل وأحياناً كثيرة بنخاف منه كمان
زى كده "كريم عبد العزيز" فى فيلم "الباشا تلميذ"
لما كان بيتضايق من كلمة "يا فاشل يا فاشل يا
فاشل".

أغلبيتنا بيحس إننا من ساعتها ، دخلنا فى صراع
دائم بين الفشل والنجاح ، وبقى الموضوع مش
بس مرتبط بالمدرسة والدراسة ، لأ دا بقى مرتبط
بالحياة بشكل عام ، فى العلاقات ، فى الشغل ،
فى كل مكان وزمان.


طيب لو فكرنا نستخدم لغة الهندسة فى عمل رسم
بيانى Diagram يوضح شكل الشخص الفاشل ،
تفتكروا هيبقى عامل إزاي؟

بيتهياىلى ممكن يبقى عامل زى الصورة دى



زى ما هو باين فى الصورة دى ، إن الوقت بيمر لكن مفيش أى معدل للنجاح ، دايمًا طالع نازل دون تحقيق أى نجاح يُذكر.


طيب لو فكرنا برضه نرسم Diagram نوضح فيه الشخص الناجح ، بيتهياىلى هيبقى عامل زى الصورة دى



زى ما هو باين فى الصورة كده ، إن فى نجاح
مستمر مع مرور الوقت.

بس الحقيقة إن الرسم البيانى السابق بتاع الشخص
الناجح مش مظبوط ، لأن على أرض الواقع
مفيش حد فينا يقدر يعمل كده طول الوقت ، مفيش
حد فينا مبيفشلش ، مفيش حد فينا مبيغلطش.

عشان كده لو فكرنا نرسم Diagram يوضح
الصورة الحقيقية (من وجهة نظرى) للشخص
الناجح ، هتبقى زى الصورة دى



زى ما هو باين فى الصورة ، إن الشخص ده مع مرور الوقت بيقع ويقوم وبعدين يرجع يقع وبعدين يقوم وهكذا ، بس الحقيقة إنه بيتعلم من أخطائه ، عشان كده أخطائه بتديله دفعة لقدام وبالتالي هو بينجح مع مرور الوقت.

الحقيقة إننا كلنا بنمر بأوقات فشل فى حياتنا ، أوقات ضعف ، أوقات إحباط ، أوقات سقوط ، لكن المهم إننا نتعلم من فشلنا ، نتعلم من سقطاتنا وساعتها بس هيبقى الفشل والسقوط هما مصدر نجاحنا.

أنا شخصياً مريت بسقطات ووقعات كتير فى حياتى ، لكن الحقيقة كنت بحس إنى كل مرة بقوم أقوى من الأول ، وحقيقى كنت بحس إنى كل مرة بتعلم حاجة جديدة من سقطاتى دى وبتكسب خبرة مختلفة فى الحياة ، عشان كده أنا مش بخاف من الفشل ، بالعكس أنا بحس إنى بتعلم منه وبيخلينى أقوى وبيخلينى أطلع لقدام.

الموضوع عامل كده زى النشاطة اللي فى
الصورة دى



كل ما تقع عليها بقوة أكبر ، كل ما ترفعك لفوق
أكثر ، وهو ده اللي بحسه من سقطاتى ، حتى لو
وقعت وكانت وقعتى قوية وكبيرة ، بقوم برضه
بقوة أكبر وبتعلم درس أكبر فى الحياة.

عشان كه أنا دايماً بحس إن الفشل هو معلمى فى
الحياة ، وإن مصدر قوتى ونجاحى هو فشلى 😊

و زى ما "الصبر مفتاح الفرج" كمان ممكن يبقى

"الفشل مفتاح النجاح"



Deluge Valve



فى مجال إطفاء الحريق اللى أنا شغال فيه ، بيبقى عندنا شبكة إطفاء حريق عبارة عن مجموعة من المحابس والمواسير ورشاشات المياه ، والمواسير دى بتبقى مليونة مياه طوال الوقت ومضغوطة زى ما قولتلکم قبل كده ، ووقت الحريق ، الرشاشات دى بتفتح أوتوماتيك وبتنزل مياه وتطفى الحريقة.

لكن أحياناً تانية فى بعض التطبيقات بنبقى محتاجين شبكة مواسير جافة (Dry) بمعنى إنها تكون فاضية ومفيهاش مياه ، لكن وقت الحريق لازم تتملى بالمياه بطريقة أوتوماتيك وتنزل المياه دى من خلال الرشاشات.

فى النوع ده من التطبيقات بنستخدم محبس اسمه محبس ديلوج "Deluge Valve" والترجمة الحرفية للإسم ده معناها "محبس غمر" لأن المحبس ده بيكون قبله مليون مياه ، وبعده فاضى ، ووقت الحريق ، المحبس ده بيفتح أوتوماتيك ويعدى المياه للمواسير اللى راکبه بعديه وبيغمر المكان كله بالمياه.

هسيبلكم شوية صور توضح الموضوع أكثر من كده.





الموضوع ده عكس الجملة الشهيرة اللي بتقول إن
 "البعد جفا" لأن مش شرط إن لو بقالك كتير
 ماشوفتش ولا إتكلت مع حد معين من الأشخاص
 اللي كانوا موجودين فى حياتك ، يبقى بينكم نوع

من الجفا ، زى ما أنت متوقع ، بالعكس أنت
ممکن لو تواصلت مع أحد الأشخاص دى تتفاجئ
من ترحابه بمكالمتك وإنه أد إيه هو سعيد
ومبسوط إنكم رجعتوا تتكلموا تانى ، وممكن
كمان لو محتاج منه مساعدة ، تلاقيه واقف جنبك
وبيغمرك بمساعدته ، زى كده لما محبس الديلوج
بيغمر كل المكان وقت الخطر والحريق.

لو أنت بقالك كثير ماتكلمتش مع حد معين فى
حياتك ، وحسيت إنك عايز تكلمه بعد ما قرئت
الكلام ده ، بيقى ماتتأخرش فى الخطوة دى ،
وقوم كلمه دلوقتى ، إذ ربما ترجع علاقة جميلة
كانت موجودة بينكم فى يوم من الأيام.

وبرضه أنت كمان لو حد تواصل معاك بعد فترة
كبيرة من إنقطاع التواصل بينكم ، إعمل كده ،
يمكن ترجع علاقتكم قوية زى الأول.

تعرف إيه عن الـ UPS ؟


كثير منّا يمكن أول مرة يسمع عن الـ UPS وكثير برضه ممكن يفنكر إن ده مدخل الفلاشة فى أجهزة الكمبيوتر ، بس الحقيقة لأ ، التانى إسمه USB لكن ده إسمه UPS وهو إختصار “Uninterruptible Power Supply” ومعناه مصدر كهرباء غير منقطع.

بس قبل ما أتكلم عن الـ UPS ومكوناته الداخلية الأساسية ، كنت عايز أعرفكم الفرق بين حاجتين دائماً بنسمع عنهم وهما AC و DC .

معلش هو الموضوع قد يبدو هندسى بحت وسخيف بس إستحملونى وكملاوا قراءة للأخر .

الكهرباء الموجودة عندنا فى البيت فى برايز الكهرباء هى من النوع AC وهى إختصار “Alternating Current” بمعنى التيار المتردد.


هسيبلكم صورة توضح شكل النوع ده من الكهرباء.



زى ما هو باين فى الصورة كده إن الموجات دى عبارة عن ترددات تحتوى على حاجة إسمها Harmonics واللى بنعتبرها كمهندسين كهرباء إنها موجات مشووه أو أحياناً بنسميها مجازاً شوائب.

بينما بقى النوع التانى من الكهرباء إسمه DC وهو إختصار "Direct Current" بمعنى التيار المستمر.

هسيبلكم صورة توضح النوع ده من الكهرباء.



زى ما هو باين من الصورة كده إن التيار المستمر خالى تماماً تقريباً من أى شوائب.

الحاجة الثانية اللي عايزكم تعرفوها هى إن كل الأجهزة الإلكترونية زى الكمبيوتر وخلافه ، جواها دائرة بتحول الـ AC اللي موجودة فى فيش الكهرباء إلى DC لأن لو التيار المتردد دخل على طول على أى مكونات إلكترونية هتتحرق وهتفرقع.

معلش هو الموضوع زى ما قولتكم طويل وسخيف شوبيتين بس إستحملونى للآخر.

الحاجة الأخيرة بقى اللي عايزكم تعرفوها قبل ما نتكلم عن الـ UPS ، هى إن نقل الكهرباء من مكان لمكان اللي بيتم عن طريق أبراج الكهرباء بيكون فى صورة AC لكن لو عايزين نخزن كهرباء ، أيوه إحنا بنعرف نخزن كهرباء ، مستغرب ليه ، إحنا فعلاً بنخزن كهرباء فى صورة DC زى كده بطاريات الموبايل اللي حضرتك ماسكه فى إيدك طول الوقت ، دى متخزن فيها كهرباء DC .

دلوقتى بقى بعد المقدمة الطويلة دى ، هنتكلم
أخيراً عن الـ UPS وهو جهاز هدفه الرئيسى إنه
يمد الأجهزة بالكهرباء زى الكمبيوتر والتليفزيون
وهكذا ، فى حالة إنقطاع الكهرباء.

الجهاز ده فى منه أحجام وأشكال كثيرة ، منه
الحجم الصغير اللى يشغل جهاز كمبيوتر ،
وأحياناً بيوصل حجمه إنه يكون داخل غرف
كبيرة.


هسييلكم صور للـ UPS توضح الموضوع ده.



الفكرة بكل بساطة إن الـ UPS ده بيدخله AC وجواه دائرة كهربية بتحول الـ AC إلى DC وبالتالي نعرف نخزن الكهرباء وبعد كده فى دائرة ثانية بتحول DC إلى AC بحيث تقدر توصل مثلاً الكمبيوتر عليه.

وفى حالة إنقطاع الكهرباء ، يبدأ الـ UPS بإمداد الكمبيوتر بالكهرباء من خلال البطاريات اللي مخزنة كهرباء DC .

هسيلاكم صورة بسيطة توضح الفكرة الداخلية لمكونات الـ UPS .



معنى كده إن الـ UPS إستقبل كهرباء AC "اللى فيها شوائب زى ما قولنا فى الأول" وبرضه خرج كهرباء AC .

لكن لما خزن كهرباء جواه ، خزنها فى صورة كهرباء DC اللى خالية من الشوائب زى ما قولنا فى الأول برضه.

ده بالظبط عامل زى الشخص اللي بيعرف يتعامل
مع الناس اللي حواليه والعالم الخارجى المليون
بالتوائب ، لكن فى نفس الوقت نقى من جواه ،
ومش بيخزن أى كراهيه أو أى مشاعر سلبية
تجاه الآخرين.

الموضوع ده من أصعب الحاجات اللي أى
شخص يحاول يعيشها ، ويحاول يحقق المعادلة
الصعبة دى.

إنه إزاي يقدر يتعامل مع الناس المختلفين عنه
وعن أفكاره ومبادئه ، لكن فى نفس الوقت يقدر
يحافظ على مبادئه وأفكاره ونقائه الداخلى ، وإنه
لما يقيم نفسه بعد مرور السنين ، يلاقى نفسه لسه
محتفظ بنقائه وأخلاقه.

الموضوع ده بيكرنى بالعبرة الشهيرة :

"كونوا حكماء كالحيات ، ودعاء كالإمام"

آخر حاجة عايز أقولها

لو سألت كل واحد فيكم عن مسمى للعصر اللي عايشين فيه دلوقتي ، أعتقد إن معظمكم هيجابو وهيقول "عصر السرعة".

ده فعلاً حقيقي ، هو فعلاً عصر السرعة ، كل حاجة عايزين نعملها بسرعة ، الطفل الصغير عايز يكبر بسرعة ، اللي في ابتدائي عايز يخلص المرحلة دي بسرعة ويطلع للمرحلة اللي بعدها.

اللي في الجامعة عايز يخلص جامعة عشان يلاقي شغل ويشغل بسرعة ، واللي بيشتغل عايز يخطب بسرعة ، واللي خاطب عايز يتجاوز بسرعة ، واللي متجاوز عايز 😊 😊

في قناة على اليوتيوب إسمها "بيسوهات" لليوتيوبر الشهير "بسام" ، القناة دي بتتكلم عن السفر والبلاد المختلفة ، في فيديو شوفته قريب على القناة بيتكلم عن "أسرع 10 بلاد في الإنترنت ، وأبطأ 10 في 2020".

هو فى الفيديو ده أخذ مثال إننا لو حبيننا نعمل
download لفيلم حجمه 5 جيجا بايت ، كانت
أسرع دولة هى ليختنشتاين وكان الفيلم هينزل فى
دقيقتين و 58 ثانية 😊 ، بينما أبطأ دولة كانت
جنوب السودان والفيلم ده هينزل فى 19 ساعة
ونص. (مصر كانت فى ساعتين و 24 دقيقة) 😊
هسيبلكم صورة لشكل القناة على اليوتيوب عشان
تخشوا تشتركوا فيها وتستمتعوا بالفيديوهات
الموجودة عليها.



يمكن بيان من كل اللى فات ده إن موضوع
السرعة هو شئ مهم فى العصر اللى إحنا فيه ،
ويمكن يكون ده حقيقى ، بس للأسف فى شئ
سلبى فى الموضوع ده ، زيه زى أى حاجة فى
الحياة ، فيها الإيجابى ، وفيها السلبى.

لما بتبقى حياتنا ماشية على وتيرة السرعة ، نمونا ونضوجنا ببيقوا أبطاً ، لأننا مش بناخد بالننا من تفاصيل كثيرة حوالينا ممكن نتعلم منها حاجات كثيرة.

أغلبية الناس بتشوف إن النضج بيكون على سن الأربعين تقريباً ، لكن الحقيقة هو إن الموضوع مش مرتبط بالسن ولا حاجة زى ما كل الناس فاكرة ، أو خلىنى أقول بطريقة أخرى هو إن الموضوع ممكن يكون مرتبط بالسن لكن بطريقة غير مباشرة.

على سن الأربعين كده ، بيبدا الواحد من نفسه يحاول يبطئ سرعة الحياة اللي هو عايشيها ، بيبقى ميال أكثر للهدوء ، ميال أكثر للجلوس فى البيت وتقليل الخروجات والفسح ، ميال أكثر إنه يأخذ وقت مع ذاته ، ساعتها بس بيبدا يلاحظ حاجات عمره ما خد باله منها قبل كده ، وبيبدأ يفكر فى حاجات بتبقى أول مرة يفكر فيها.

الحاجات دى مش شرط تكون حاجات عظيمة عشان يلاحظها أو يأخذ باله منها ، لكن على العكس ، يمكن تكون حاجات بسيطة بيعملها فى اليوم المعتاد بتاعه.

عشان كده يمكن تكون فى مواضيع أنت قريرتها
فى الكتاب ده ملهاش علاقة بالهندسة ولا حاجة ،
لكن هتلاقى ليها علاقة بالحياة بشكل عام ، لكن
هى مكتوبة من وجهة نظر مهندس جاى من
خلفية هندسية.

أنتم لو روحنوا قريرتوا المراجع بتاعة الكتاب ده
اللى أنا إستفدت منها فى كتابته ، هتلاقوها غريبة
شويتين ، وهتلاقوا فى منها حاجات بسيطة بعملها
فى اليوم الإعتيادى بتاعى.

مش معنى كلامى طبعاً إنك تكون بطئ فى حياتك
أو فى شغلك ، لكن الهدف من الكلام ده هو إنك
تأخذ وقت مع ذاتك وتفكر فى الحاجات البسيطة
اللى بتعملها كل يوم ، ساعتها أكيد هتتعلم حاجة
جديدة ، وساعتها أكيد شخصيتك هتتطور 😊.

شكر أخير

فى النهاية أحب أشكر كل حد فىكم أخذ خطوة
شراء كتاب لكاتب مجهول ، أول مرة فى حياته
يكتب أصلاً .

أحب إنكم تتواصلوا معايا عشان أعرف كل
ملاحظاتكم وتعليقاتكم على الكتاب ، ويا ريت
أعرف إيه أكثر حاجة لمستك فى الكتاب ، وإيه
أكثر حاجة نويت إنك تحاول تعملها لما قربتها .

ولو فى حد فىكم بيعلم تحت الكلمات اللى لمستته ،
يبقى يا ريت يبعثلى صورة من الحاجات اللى علم
عليها وحت تحتها خط ☺ ☺

ممکن تتواصلوا معايا على البريد الإلكتروني

ayman.fawzy1280@gmail.com

أو على الواتساب [+201201200336](tel:+201201200336)



شكر

المراجع

المراجع اللى إستفدت منها فى الكتاب ده ، بعضها
تقليدى وطبيعى ، والبعض الآخر قد يبدو لك
غريب شويتين زى الكتاب كده بالظبط 😊 😊
المراجع دى هى كالاتى :-

- الحاجات اللى إتعلمتها من الحياة.
- الحاجات اللى إتعلمتها من الهندسة.
- الإنجيل – العهد الجديد.
- القرآن الكريم.
- الأعمال المنزلية 😊.
- هواية الخط العربى.
- تمارين المقاومة (تمارين الحديد).
- كتاب "السعادة تنبع من الداخل".
- قناة "بيسوهات" على اليوتيوب.

الفهرس

5	إهداء
7	شكر خاص
9	نصيحة قبل ما تقرأ الكتاب ده
11	مقدمة
17	كلمات
21	غسيل المواعين
27	بتعرف تعد لغاية كام؟
31	ما تيجوا نلعب
37	ريموت التليفزيون
41	ما تيجوا نلعب تانى
45	إختبار قراءة
51	إختبار حساب
55	ما تيجوا نلعب مرة كمان
59	بتعرف تقرأ؟

63 ما تيجوا نلعب لعبة أخيرة
69 Recycle Bin
73 ما بين المطرقة والسندان
77 بتعرف تكوى؟
83 عداد الضغط
87 موتور المياه
91 يا فاشل يا فاشل يا فاشل
97 Deluge Valve
101 تعرف إيه عن الـ UPS؟
107 آخر حاجة عايز أقولها
111 شكر أخير
113 المراجع



شارك سطورك مع العالم

01122380443